



ՀԱՅԱՍՏԱՆԻ ՀԱՄՐԱՊԵՏՈՒԹՅԱՆ
ԳՆՈՒՄՆԵՐԻ ԲՈՂՈՔԱՐԿՄԱՆ ԽՈՐՀՈՒՐԴ

ք. Երևան

12.01.2018թ.

Ո Ր Ո Շ ՈՒ Մ
ՀՀ գնումների բողոքարկման խորհրդի
թիվ ԳԲԽ-ԱՄ-2017/52

Հայաստանի Հանրապետության գնումների բողոքարկման խորհուրդը (այսուհետ նաև՝ խորհուրդ)՝ քննելով «Ֆոտոն» ՍՊԸ-ի 26.12.2017թ. ներկայացրած բողոքը (այսուհետ նաև՝ ԳԲԽ-ԱՄ-2017/52 բողոք) և կից փաստաթղթերը, պարզեց հետևյալը.

1. «Ֆոտոն» ՍՊԸ-ի ներկայացրած փաստերը, հիմնավորումները և պահանջը

«Ֆոտոն» ՍՊԸ-ն (այսուհետ նաև՝ Ընկերություն) 26.12.2017թ. խորհրդին ներկայացրած բողոքով հայտնել է, որ «Եղվարդի N 1 մանկապարտեզ» ՀՈԱԿ-ի կարիքների համար սննդամթերքի ձեռքբերման նպատակով կազմակերպված «ԿՄԵՔ-ՄՀՈԱԿ-ԳՀԱՊԶԲ18/1» ծածկագրով գնանշման հարցման ընթացակարգին (այսուհետ նաև՝ Ընթացակարգ) մասնակցելու նպատակով հայտեր են ներկայացրել «ԿԱՐԱՐԹ» և «Հեյթի ֆոտ» ՍՊԸ-ները:

Ընկերությունը հայտնել է, որ Ընթացակարգի հրավերի 1-ին մասի 7-րդ կետի 7.1 ենթակետի համաձայն՝ Մասնակիցը հայտով՝ սույն հրավերով սահմանված կարգով ներկայացնում է հայտի ապահովում, որի չափը հավասար է հայտով ներկայացվող գնի հինգ տոկոսին: «ԿԱՐԱՐԹ» ՍՊԸ-ի կողմից ներկայացված գնային առաջարկը կազմում է 24 696 619 ՀՀ դրամ, որի հայտի ապահովման գումարը կազմում է 1 234 830.95 ՀՀ դրամ,

սակայն վճարման պահանջագրի մեջ նշվել է 1 235 000 ՀՀ դրամ: «Հելթի ֆուդ» ՍՊԸ-ի կողմից ներկայացված գնային առաջարկը կազմում է 16 275 022.8 ՀՀ դրամ, որի հայտի ապահովման գումարը կազմում է 813 751.14 ՀՀ դրամ, սակայն վճարման պահանջագրի մեջ նշվել է 1 627 570 ՀՀ դրամ:

Ընկերության կողմից որպես բողոքի իրավական հիմքեր և հիմնավորումներ նշվել է հետևյալը՝

«Գնումների մասին» ՀՀ օրենքի (այսուհետ նաև՝ Օրենք) 34-րդ հոդվածի 1-ին մասի համաձայն՝ հայտերը գնահատվում են հրավերով սահմանված կարգով: Բավարար են գնահատվում հրավերով նախատեսված պայմաններին համապատասխանող հայտերը, հակառակ դեպքում հայտերը գնահատվում են անբավարար և մերժվում են:

ՀՀ կառավարության 04.05.2017թ. «Գնումների գործընթացի կազմակերպման» կարգի 526-Ն որոշման 40-րդ կետի 4-րդ ենթակետի համաձայն (այսուհետ նաև՝ Կարգ)՝ հայտերի բացման նիստում հանձնաժողովը մերժում է այն հայտերը, որոնցում բացակայում են գնային առաջարկը և (կամ) հայտի ապահովումը կամ եթե դրանք ներկայացված են հրավերի պահանջներին անհամապատասխան: Գնումն էլեկտրոնային համակարգով իրականացվելու դեպքում հիմք է ընդունվում համակարգում կցված՝ մասնակցի կողմից հաստատված գնային առաջարկը:

Կարգի 41-րդ կետի համաձայն՝ եթե հայտերի բացման նիստի ընթացքում իրականացված գնահատման արդյունքում մասնակցի հայտում արձանագրվում են անհամապատասխանություններ՝ հրավերի պահանջների նկատմամբ, բացառությամբ այն դեպքերի, երբ հայտում բացակայում է գնային առաջարկը կամ հայտի ապահովումը, կամ գնային առաջարկը, կամ հայտի ապահովումը ներկայացված է հրավերի պահանջներին անհամապատասխան, ապա հանձնաժողովը մեկ աշխատանքային օրով կասեցնում է նիստը, իսկ հանձնաժողովի քարտուղարը նույն օրը դրա մասին էլեկտրոնային եղանակով տեղեկացնում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունը:

Ընկերությունը հայտնել է, որ Ընթացակարգի գնահատող հանձնաժողովը պետք է մերժեր «ԿԱՐԱՐԹ» և «Հելթի ֆուդ» ՍՊԸ-ների հայտերը, քանի որ երկուսի դեպքում էլ ներկայացված հայտի ապահովումները կազմված են հրավերի պահանջներին անհամապատասխան՝ հայտի ապահովման գումարը 5 տոկոսից ավելի է գրվել:

Օրենքի 46-րդ հոդվածի 1-ին մասի համաձայն՝ յուրաքանչյուր անձ իրավունք ունի բողոքարկելու պատվիրատուի, գնահատող հանձնաժողովի և գնումների բողոքարկման խորհրդի գործողությունները (անգործությունը) և որոշումները:

Նույն հոդվածի 3-րդ մասի համաձայն՝ յուրաքանչյուր անձ իրավունք ունի սույն օրենքի համաձայն՝

1) նախքան պայմանագրի կնքումը բողոքարկելու պատվիրատուի և գնահատող հանձնաժողովի գործողությունները (անգործությունը) և որոշումները գնումների բողոքարկման խորհրդին.

2) դատական կարգով բողոքարկելու գնումների բողոքարկման խորհրդի, պատվիրատուի և գնահատող հանձնաժողովի գործողությունները (անգործությունը) և որոշումները:

Օրենքի 50-րդ հոդվածի 7-րդ մասի համաձայն՝ Խորհուրդն իրավունք ունի պատվիրատուի և գնահատող հանձնաժողովի գործողությունների կամ անգործության վերաբերյալ ընդունելու հետևյալ որոշումները.

ա. արգելելու կատարել որոշակի գործողություններ և ընդունել որոշումներ,

բ. պարտավորեցնելու ընդունել համապատասխան որոշումներ, ներառյալ՝ չկայացած հայտարարելու գնման ընթացակարգը, բացառությամբ պայմանագիրը անվավեր ճանաչելու մասին որոշման,

գ. փոփոխելու ընդունված որոշումները.

Ընկերությունը ներկայացված բողոքով Խորհրդին խնդրել է չեղյալ համարել «Եղվարդի N 1 մանկապարտեզ» ՀՈԱԿ-ի կարիքների համար՝ սննդամթերքի ձեռքբերման նպատակով հայտարարված թիվ ԿՄԵԲ-ՄՀՈԱԿ-ԳՀԱՊԶԲ18/1 ծածկագրով անցկացվող գնանշման հարցման հանձնաժողովի 14.12.2017թ. հայտերի բացման նիստի թիվ 2 արձանագրությունը, ինչպես նաև մերժել «Հելթի ֆուդ» և «ԿԱՐԱՐԹ» ՍՊԸ-ների հայտերը:

«Ֆոտոն» ՍՊԸ-ն, պատշաճ ծանուցված լինելով Խորհրդի 28.12.2017թ. ժամը 11:40-ի նիստի վերաբերյալ, ապահովել է իր ներկայացուցչի մասնակցությունը, ով պնդել է 26.12.2017թ. բողոքով Խորհրդին հայտնած դիրքորոշումը:

2. «Եղվարդի N 1 մանկապարտեզ» ՀՈԱԿ-ի կողմից բողոքի վերաբերյալ ներկայացված փաստերը և հիմնավորումները

«Եղվարդի N 1 մանկապարտեզ» ՀՈԱԿ-ը 28.12.2017թ. Խորհրդին է ներկայացրել «ԿՄԵՔ-ՄՀՈԱԿ-ԳՀԱՊՁԲ18/1» ծածկագրով գնանշման հարցման ընթացակարգին վերաբերող փաստաթղթերը, սակայն գրավոր դիրքորոշում բողոքի վերաբերյալ Խորհրդին չի ներկայացրել:

Պատվիրատուն, պատշաճ ծանուցված լինելով Խորհրդի 28.12.2017թ. ժամը 11:40-ի նիստի վերաբերյալ, չի ապահովել իր ներկայացուցչի մասնակցությունը:

3. ԳԲԽ-ԱՄ-2017/52 բողոքի քննության համար էական նշանակություն ունեցող փաստերը

ԳԲԽ-ԱՄ-2017/52 բողոքի քննության համար էական նշանակություն ունեն հետևյալ փաստերը՝

1. «Եղվարդի N 1 մանկապարտեզ» ՀՈԱԿ-ի կարիքների համար սննդամթերքի ձեռքբերման նպատակով կազմակերպվել է «ԿՄԵՔ-ՄՀՈԱԿ-ԳՀԱՊՁԲ18/1» ծածկագրով գնանշման հարցման ընթացակարգ, որին մասնակցելու նպատակով ի թիվս այլ մասնակիցների հայտեր են ներկայացրել նաև «Հելթի ֆուդ» և «ԿԱՐԱՐԹ» ՍՊԸ-ները:

2. «ԿԱՐԱՐԹ» ՍՊԸ-ն հայտի թիվ 5 հավելվածով ներկայացրել է գնային առաջարկ, որի ընդհանուր գինը կազմել է 24 696 619 ՀՀ դրամ:

3. «ԿԱՐԱՐԹ» ՍՊԸ-ն հայտի թիվ 10 հավելվածին՝ տուժանքի մասին համաձայնագրին կից ներկայացրել է մասնակցության հայտի ապահովման վճարման պահանջագիրը, որտեղ հայտի ապահովման գումարի չափը նշել է 1 235 000 ՀՀ դրամ:

4. «Հելթի ֆուդ» ՍՊԸ-ն հայտի թիվ 5 հավելվածով ներկայացրել է գնային առաջարկ, որի ընդհանուր գինը կազմել է 16 275 000 ՀՀ դրամ:

5. «Հելթի ֆուդ» ՍՊԸ-ն հայտի թիվ 10 հավելվածին՝ տուժանքի մասին համաձայնագրին կից ներկայացրել է մասնակցության հայտի ապահովման վճարման պահանջագիրը, որտեղ հայտի ապահովման գումարի չափը նշել է 1 627 570 ՀՀ դրամ:

6. Ընթացակարգի գնահատող հանձնաժողովի 14.12.2017թ. ժամը 12:00-ի նիստի թիվ 2 արձանագրության 7-րդ կետով կայացված որոշմամբ «Հելթի ֆուդ» ՍՊԸ-ն թիվ 1, 2, 7-11, 14, 18, 20-22, 27, 32, 34, 35, 38, 39, 44 իսկ «ԿԱՐԱՐԹ» ՍՊԸ-ն՝ թիվ 4, 5, 30 և 36-րդ չափաբաժիններով ճանաչվել են առաջին տեղ զբաղեցրած մասնակիցներ:

7. Նույն արձանագրությամբ կայացված որոշմամբ որոշվել է ծանուցել առաջին տեղ զբաղեցրած մասնակիցներին 3 աշխատանքային օրվա ընթացքում՝ մինչև դեկտեմբերի 21-ը սույն հրավերով սահմանված կարգով և ժամկետում ներկայացնել հրավերի 6-րդ հավելվածով նախատեսված գրությունը, որին կցվում է իր կողմից հաստատված՝ առաջարկվող ապրանքի ամբողջական նկարագիրը՝ համաձայն հավելված N 6.1-ի:

4. Խորհրդի հիմնավորումները և եզրահանգումը

ՀՀ գնումների բողոքարկման խորհուրդը, ռառամասիրելով «Ֆոտոն» ՍՊԸ-ի կողմից 26.12.2017թ. ներկայացված բողոքը և «Եղվարդի N 1 մանկապարտեզ» ՀՈԱԿ-ի կողմից 28.12.2017թ. ներկայացված փաստաթղթերը, հայտնում է հետևյալը.

«Գնումների մասին» ՀՀ օրենքի (այսուհետ՝ Օրենք) 34-րդ հոդվածի 1-ին մասի համաձայն՝ հայտերը գնահատվում են հրավերով սահմանված կարգով: Բավարար են գնահատվում հրավերով նախատեսված պայմաններին համապատասխանող հայտերը, հակառակ դեպքում հայտերը գնահատվում են անբավարար և մերժվում են:

Օրենքի 32-րդ հոդվածի 1-ին մասի համաձայն՝ **Մասնակիցը հայտով՝ հրավերով սահմանված պահանջով ներկայացնում է հայտի ապահովում, որի չափը հավասար է հայտով առաջարկվող գնի մինչև հինգ փոկոսին:** Հայտի ապահովումը ներկայացվում է միակողմանի հաստատված հայտարարության՝ տուժանքի կամ բանկային երաշխիքի կամ կանխիկ փողի ձևով: Կանխիկ փողի ձևով ներկայացված հայտի ապահովումը պահվում է լիազոր մարմնի անվամբ բացված գանձապետական հաշվում:

ՀՀ կառավարության 04.05.2017թ. 526-Ն որոշմամբ հաստատված «Գնումների գործընթացի կազմակերպման» կարգի 32-րդ կետի 9-րդ ենթակետի համաձայն՝ եթե տվյալ ընթացակարգի շրջանակում գնվելիք ապրանքի, աշխատանքի կամ ծառայության նախահաշվային գինը չի գերազանցում գնումների բազային միավորի յոթանասունապատիկը, ապա հայտի ապահովումը ներկայացվում է միակողմանի

հաստատված հայտարարության՝ տուժանքի կամ կանխիկ փողի ձևով: Այլ դեպքերում հայտի ապահովումը ներկայացվում է բանկային երաշխիքի կամ կանխիկ փողի ձևով:

Կարգի 40-րդ կետի 4-րդ ենթակետի համաձայն՝ **հայտերի բացման նիստում հանձնաժողովը մերժում է այն հայտերը, որոնցում բացակայում են գնային առաջարկը և (կամ) հայտի ապահովումը կամ եթե դրանք ներկայացված են հրավերի պահանջներին անհամապատասխան:** Գնումն էլեկտրոնային համակարգով իրականացվելու դեպքում հիմք է ընդունվում համակարգում կցված՝ մասնակցի կողմից հաստատված գնային առաջարկը:

Կարգի 41-րդ կետի համաձայն՝ եթե հայտերի բացման նիստի ընթացքում իրականացված գնահատման արդյունքում մասնակցի հայտում արձանագրվում են անհամապատասխանություններ՝ հրավերի պահանջների նկատմամբ, բացառությամբ այն դեպքերի, երբ հայտում բացակայում է գնային առաջարկը կամ հայտի ապահովումը, կամ գնային առաջարկը, կամ հայտի ապահովումը ներկայացված է հրավերի պահանջներին անհամապատասխան, ապա հանձնաժողովը մեկ աշխատանքային օրով կասեցնում է նիստը, իսկ հանձնաժողովի քարտուղարը նույն օրը դրա մասին էլեկտրոնային եղանակով տեղեկացնում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունը:

«Եղվարդի N 1 մանկապարտեզ» ՀՈԱԿ-ի կարիքների համար սննդամթերքի ձեռքբերման նպատակով կազմակերպվել է «ԿՄԵՔ-ՄՀՈԱԿ-ԳՀԱՊՁԲ18/1» ծածկագրով գնանշման հարցման ընթացակարգ:

Ընթացակարգի հրավերի ՄԱՍ 1-ի 7-րդ կետի 7.1-րդ ենթակետի համաձայն՝ **Մասնակիցը հայտով՝ սույն հրավերով սահմանված կարգով ներկայացնում է հայտի ապահովում, որի չափը հավասար է հայտով ներկայացվող գնի հինգ փոկոսին:** Հայտի ապահովումը ներկայացվում է միակողմանի հաստատված հայտարարության՝ տուժանքի կամ կանխիկ փողի ձևով:

Ընթացակարգի հրավերի ՄԱՍ 1-ի 8-րդ կետի 8.2 ենթակետի համաձայն՝ հայտերը գնահատվում են սույն հրավերով սահմանված կարգով: **Բավարար են գնահատվում սույն հրավերով նախատեսված պայմաններին համապատասխանող հայտերը, հակառակ դեպքում հայտերը գնահատվում են անբավարար և մերժվում են: Ընդ որում հայտերի բացման նիստում հանձնաժողովը մերժում է այն հայտերը, որոնցում բացակայում են**

գնային առաջարկը և/կամ հայտի ապահովումը կամ դրանք ներկայացված են հրավերի պահանջներին անհամապատասխան:

«ԿԱՐԱՐԹ» ՍՊԸ-ն հայտի թիվ 5 հավելվածով ներկայացրել է գնային առաջարկ, որի ընդհանուր գինը կազմել է **24 696 619 ՀՀ դրամ:**

Միևնույն ժամանակ «ԿԱՐԱՐԹ» ՍՊԸ-ն հայտի թիվ 10 հավելվածին՝ տուժանքի մասին համաձայնագրին կից ներկայացրել է մասնակցության հայտի ապահովման վճարման պահանջագիրը, որտեղ հայտի ապահովման գումարի չափը նշել է **1 235 000 ՀՀ դրամ:**

«Հեյթի ֆուդ» ՍՊԸ-ն հայտի թիվ 5 հավելվածով ներկայացրել է գնային առաջարկ, որի ընդհանուր գինը կազմել է **16 275 000 ՀՀ դրամ:**

Միևնույն ժամանակ «Հեյթի ֆուդ» ՍՊԸ-ն հայտի թիվ 10 հավելվածին՝ տուժանքի մասին համաձայնագրին կից ներկայացրել է մասնակցության հայտի ապահովման վճարման պահանջագիրը, որտեղ հայտի ապահովման գումարի չափը նշել է **1 627 570 ՀՀ դրամ:**

Օրենքի 32-րդ հոդվածի 1-ին մասի համաձայն՝ ***Մասնակիցը հայտով՝ հրավերով սահմանված պահանջով ներկայացնում է հայտի ապահովում, որի չափը հավասար է հայտով առաջարկվող գնի մինչև հինգ տոկոսին:***

Ընթացակարգի հրավերի ՄԱՍ 1-ի 7-րդ կետի 7.1-րդ ենթակետի համաձայն՝ ***Մասնակիցը հայտով՝ սույն հրավերով սահմանված կարգով ներկայացնում է հայտի ապահովում, որի չափը հավասար է հայտով ներկայացվող գնի հինգ տոկոսին:***

Այսպիսով, վերոգրյալ իրավական հիմնավորումներից ելնելով, Խորհուրդն արձանագրում է, որ «ԿԱՐԱՐԹ» և «Հեյթի ֆուդ» ՍՊԸ-ների կողմից ներկայացված հայտի ապահովման չափը գերազանցում է վերջիններիս կողմից ներկայացված գնային առաջարկների հինգ տոկոսը, քանի որ «ԿԱՐԱՐԹ» ՍՊԸ-ի կողմից ներկայացված գնային առաջարկի հինգ տոկոսը կազմում է **1 234 830.95 ՀՀ դրամ**, այլ ոչ **1 235 000 ՀՀ դրամ**, իսկ «Հեյթի ֆուդ» ՍՊԸ-ի կողմից ներկայացված գնային առաջարկի հինգ տոկոսը կազմում է **813 751.14 ՀՀ դրամ**, այլ ոչ **1 627 570 ՀՀ դրամ**, ուստի նման պայմաններում Խորհուրդը գտնում է, որ «ԿԱՐԱՐԹ» և «Հեյթի ֆուդ» ՍՊԸ-ների կողմից «ԿՄԵՔ-ՄՀՈԱԿ-ԳՀԱՊՁԲ18/1» ծածկագրով գնանշման հարցման ընթացակարգի շրջանակներում ներկայացված հայտի ապահովումը չի համապատասխանում հրավերի պահանջներին, քանի որ չի բավարարում գնային առաջարկի հինգ տոկոսի չափով ներկայացված լինելու պահանջին:

Կարգի 40-րդ կետի 4-րդ ենթակետի համաձայն՝ *հայտերի բացման նիստում հանձնաժողովը մերժում է այն հայտերը, որոնցում բացակայում են գնային առաջարկը և (կամ) հայտի ապահովումը կամ եթե դրանք ներկայացված են հրավերի պահանջներին անհամապատասխան:*

Այսպիսով, խորհուրդը գտնում է, որ «Ֆոտոն» ՍՊԸ-ի կողմից ներկայացված բողոքը սույն մասով հիմնավոր է և ենթակա է բավարարման, քանի որ «ԿԱՐԱՐԹ» և «Հելթի ֆոտ» ՍՊԸ-ների հայտերը Օրենքի 34-րդ հոդվածի 1-ին մասի, Կարգի 40-րդ կետի 4-րդ ենթակետի, ինչպես նաև Ընթացակարգի հրավերի 8-րդ կետի 8.2 ենթակետի համաձայն՝ ենթակա էր մերժման հայտերի բացման նիստում:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասով՝ ՀՀ գնումների բողոքարկման խորհուրդը

Ո Ր Ո Շ Ե Ց

«Ֆոտոն» ՍՊԸ-ի կողմից ՀՀ գնումների բողոքարկման խորհրդին 26.12.2017թ. ներկայացված բողոքը բավարարել մասնակի, մասնավորապես՝

1. «Եղվարդի N 1 մանկապարտեզ» ՀՈԱԿ-ի կարիքների համար՝ սննդամթերքի ձեռքբերման նպատակով հայտարարված թիվ ԿՄԵՔ-ՄՀՈԱԿ-ԳՀԱՊՁԲ18/1 ծածկագրով գնանշման հարցման հանձնաժողովի 14.12.2017թ. հայտերի բացման նիստի թիվ 2 արձանագրությունը չեղյալ համարելու մասին պահանջը մերժել:

2. «Հելթի ֆոտ» և «ԿԱՐԱՐԹ» ՍՊԸ-ների հայտերը մերժելու մասին պահանջը բավարարել:

ՀՀ գնումների բողոքարկման խորհրդի որոշումն իրավապարտադիր է:

ՀՀ գնումների բողոքարկման խորհրդի որոշումը կարող է բողոքարկվել դատական կարգով:

ՀՀ գնումների բողոքարկման
խորհրդի անդամ՝



ՄՀԵՐ ԱՆԱՆՅԱՆ